

每週經課朗誦經文(巴克禮台語漢字)2013/01/06

共同經課 - 1 以賽亞書六十章一節~六節

1 起來啊，發出光！因為你的光已經到！耶和華的榮光發現，照佇你的頂面。2 看啊，黑暗欲蓋全地，黑黑暗暗遮蓋列國，總是耶和華欲發現照你，伊的榮光欲出現佇你的身上。3 列國欲來就近你的光；君王欲來就近你發現的大光。4 你抬目看四方；in攏聚集來你遮。你的眾子對遠遠來；你的眾查某子亦欲互人抱來。5 彼時，你看見就有榮光；你的心大印愕大開闊；因為大海豐盛的財物欲轉轉來歸你；列國的財寶亦欲來歸你。6 歸陣的駱駝，及米甸以及以法單陵的駱駝欲遍滿你的境內；示巴的眾人攏欲到；欲帶黃金乳香來，亦欲報傳耶和華的名聲。

共同經課 - 2 詩篇七十二篇一節~七節，十節~十四節

1 〔所羅門的詩。〕上帝啊，求你將你的判斷賞賜王，將你的公義賞賜王的子。2 伊欲照公義審判你的百姓，照公平判斷你許個困苦的人。3 大山欲因為公義互百姓平安，山仔也欲按呢。4 伊欲給百姓中困苦的人判斷，伊欲救喪鄉的人，伊欲壓碎暴虐的人。5 人欲敬畏你，日久月長，直到萬世代！6 伊欲降臨，親像雨落佇已經割的草，親像及時的雨潤澤土地。7 佇伊的日子，義人欲興旺，大大平安，及月平久。10 他施及海嶼的列王欲進貢；示巴及西巴的王欲獻禮物。11 列王攏欲仆落拜伊；萬國攏欲服事伊。12 因為，喪鄉人求叫的時，伊欲救伊；困苦無依倚的人，伊也欲救。13 伊欲憐憫清淡喪鄉的人，伊欲拯救喪鄉人的生命。14 伊欲救贖in的生命脫離壓迫及暴虐；伊欲看in的血做寶貝。

共同經課 - 3 以弗所書三章一節~十二節

1 因為按呢，我——保羅為著恁外邦人做基督耶穌的囚犯。2 恁若曾聽見上帝，為著恁所賞賜我恩典的職份，3 就是用啓示互我知彼個奧妙，親像我已經有大略寫的。4 恁讀伊，就會曉得我知影基督的奧妙。5 是前代未曾互人知的，無親像現今佇聖神啓示伊諸個聖的使徒先知一樣。6 就是外邦人佇基督耶穌，對福音，同做後嗣，同做一個身體，相及有份佇所應允的。7 我做此個福音的差用，照上帝恩典的賞賜，就是照伊的權能所運來賞賜我的。8 我是眾聖徒中上第一細的，得著此個恩典賞賜我，通將基督袂度得的富有傳互外邦，9 也互眾人攏明白，此個奧妙是怎樣安排，就是歷代以來因密佇造萬物的上帝的，10 今欲對教會互佇天裡諸個辦政事的、有權能的，知上帝百般的智慧。11 照伊佇咱的主基督耶穌所定著萬代的旨意。12 惦佇伊，咱諸個對信伊，有好膽閣嗜哉，來親近上帝。

共同經課 - 4 馬太福音二章一節~十二節

1 當希律王的時，耶穌已經出世佇猶太的伯利恆。有幾若個博士對東方來到耶路撒冷，講：2 「出世做猶太人的王的佇叨落？因為阮佇東方有看見伊的星，才來欲拜伊。」3 希律王聽見，就迫腹；通耶路撒冷亦是按呢。4 就聚集眾祭司頭及百姓間的經學士，問in：「基督著佇甚麼所在出世？」5 in給伊講：「佇猶太的伯利恆。因為先知有記載，講：6 猶太地伯利恆啊，佇猶太諸個頭人中你攏毋是第一細的；因為欲有一個人君對你出，來照顧我的百姓以色列。」7 對按呢，希律暗靜召博士，對in詳細查彼個星出現的時，8 就差in去伯利恆，講：「恁去詳細探聽彼個嬰仔的事，尋著就來給我講，互我也通去拜伊。」9 in聽王的話就去。忽然東方所看見的星做頭導in，到嬰仔的所在，就歇佇彼頂面。10 in看見彼個星，歡喜到袂顧得；11 入厝，看見嬰仔及伊的老母馬利亞，就仆落拜嬰仔，開in的寶盒，獻禮物互伊，就是黃金、乳香、沒藥。12 閣佇眠夢中得著指點，教in毋通倒轉去就近希律，就對別條路倒去本所在。